

修訂日期: 2004/11/20 發行日期: 2006/2/15

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 17, No. 748

原始資料: 蕭鎮國大德提供, Monica 大德輸入, 北美某大德提供

## No. 748

### 佛說護淨經

#### 失譯人今附東晉錄

往昔佛共阿難行。遇值一池。東西四十里。南北四十里。深四十里。池中有虫。其形似科蚪形黑如墨。佛語阿難。識此池中虫不。答言不識。佛語阿難。此池中虫者。十方世界大眾僧。食不淨食。墮此臭穢糞屎池中。常食不淨。五百萬世中受此苦惱竟。後五百世中復墮餓狗中。常食不淨。復墮猪中。五百世常食不淨。復墮蜚蠊中常食不淨。亦五百世得出為人。常生貧窮家。衣不覆形。食不充口。常食糠飯。恒飢不足。佛語諸比丘。有如是者。受罪尤苦。無量無邊。誠語後世末法中諸比丘。不可不慎。一切眾僧。有住止處。作不淨食。不足往食。欲淨食者。一切白衣食。如法著衣持鉢。稱四威儀。如法往造。乞是真比丘。除其邪命。如法活命。佛不妄言。福報如影響。往昔比丘。新得阿羅漢有結業身有便利患。夜闍上廁。見一比丘。在廁邊呻吟。阿羅漢語是比丘。汝本好用意人。云何墮餓鬼中。呻吟如是。餓鬼比丘答言。我餓渴來久。五百餘年。不見漿水。正欲趣廁用食不淨。護廁鬼神。鐵杖打我。不得近廁。憶念本曾作比丘。知僧事時。是用觸眾僧淨。食以不淨食食眾僧。故致此殃。遇值阿羅漢善知識。阿羅漢。為比丘僧中。燒香呪願。即免餓鬼。還復人道。佛語諸比丘。不可不慎。一切不得觸眾僧淨食。佛不虛言。福報如影響。十八地獄經中出罪福。此餓鬼本從人道中來。以不清淨手。觸眾僧淨器。以不淨手。觸沙門淨食。以不淨食。著沙門淨食中。以不淨食。食眾僧故。後五百世中。墮餓鬼中。常食不淨。欲趣廁上食糞于時廁神。手捉鐵杖打之。令不得近。此鬼食人膿血。涕唾及蕩滌惡汁。常伺捕婦女產血不淨。以為飲食。復經五百世。墮猪狗蜚蠊之中。常食臭糞不淨。受斯苦劇。累世如此。於百千劫。無有出期。難得解脫。痛不可言。以不淨手觸男根。或觸女根。觸沙門淨器。觸沙門淨食。以不淨食。著沙門淨食中。以不淨食。食眾僧故。致此殃。一切人肉眼不知罪福。自今以後。欲得福祐。佐眾僧作食。以清淨手。捉眾僧淨器。淨手淘米。及以淨米。著眾僧淨食中者得福無量。自今以後。以此為常。一切眾人。普使聞知。一切檀越。施設法會。供齋調度。持齋者得食。不持齋者不得食。此飯一日持齋。得六十萬世餘糧。不持齋者。六十萬世。墮餓鬼中。何以故。此信施難銷。故寧吞熱鐵丸。不食此飯。吞熱鐵丸。須臾間耳。食此信施。久受大苦。五百萬世中。受餓鬼苦。諸有設食之處。一切如法作齋。不得懷挾餘殘食。歸給妻子。若食此飯。若腋底挾擔。後五百世。常挾熱鐵輪。左腋底入。從右腋底出。一切齋飯

。不可不慎。一米化作熱丸。一切賢者。施設福會。於先嘗啜此食。都作殘食。唐作此會。不如不作。何以故。諸天不歡。鬼神不喜。此人於先嘗者。亦五百世中。受餓鬼苦。自今已後。欲得福者。如法作齋食。可得福德。諸天歡喜。百神慶悅。天神擁護。經不虛言。福報如影響。

### 佛說護淨經